

靈而不可知者也故鬼之所以不神者非無神也其神不傷而已故曰非其鬼不神其神不傷人

葉夢得曰詩頌文王之聖至於思齊曰神罔時怨繼之曰神罔時恫豈不以鬼無所怨於人則亦無恫於人降之嘉祥而禍災不至其有傷之者乎

晦菴朱熹曰老子謂以道莅天下者其鬼不神若是王道修明則此等不正之氣都消鑠了

黃茂材曰有道之世人能養其神不使其鬼勝故曰其鬼不神有干越之劍者柙而藏之不敢用也寶之至也聖人之不輕用其神亦如其劍雖曰神不傷人是亦聖人能養其神使

道藏輯要

道德真經
彭鶴林集註

卷

心集七

不傷人爾故曰兩不相傷德交歸焉

大國者下流章第六十一

大國者下流

御註曰人莫不有趨高之心而趨高者常蹶江海所以能為百谷王者以其善下之也

頴濱蘇轍曰天下之歸大國猶眾水之趨下流也

臨川王安石曰大國下流者如眾人之所惡也非君子惡居之下流也

道真仁靜先生曹道沖曰人以謙為德海以容為量自高者不受於物能下者為物所歸

清源子劉驥曰一身之設一國之象也身之虛而萬物至心之無而和氣歸虛無者聖人之所居所謂大國也以其不爭而天下莫能與之爭至於萬物之精華無極之物自來歸之猶泉水之趨下流也經所謂知其雄守其雌爲天下谿此之謂也

天下之交天下之牝牝常以靜勝牡以靜爲下故大國以下小國則取小國小國以下大國則取大國故或下以取或下而取御註曰天下皆以剛強敵物而我獨寓於柔靜不爭之地則人孰勝之者是乃所以交天下之道

碧虛子陳景元曰天下之所交牝者以其大國善守雌牝柔

道藏輯要

道德真經
彭鶴林集註

真

心集七
XO

靜之德故能攝伏天下雄壯之國

涑水司馬光曰交猶歸聚也

頴濱蘇轍曰衆動之赴靜猶衆高之赴下也大國下以取人小國下而取於人

臨川王安石曰交者衆人之會能處衆人之所惡則天下之動莫不歸之矣故曰天下之交牝蓋天下之交交於牝而已道真仁靜先生曹道沖曰牝者母也物莫不慕其母也牝柔而靜牡剛而動常爲牝之驅役故聖人知雄守雌柔而不爭虛而處下物皆歸之

達真子曰牝者靜也牡者動也以靜爲衆動之所歸以牝爲

眾牡之所往理固無他以靜爲下故也爲國者體此以靜制動以牝制牡故大國以下小國能屈己之勢也大國屈己之勢則取小國矣小國以下大國能畏彼之勢也小國能畏彼之勢則取大國矣以用也以取者力行而取也而取者自然而取也大國忘勢難在乎力行故曰以取小國趨勢易情之自然故曰而取

陳象古曰交謂交結而附於己者也

葉夢得曰取之爲言得其所欲之謂也

清源子劉驥曰天一生水在人爲精地二生火在人爲精神者陽中之陰故謂之雌亦天下之牝也聖人知雄守雌以陰

道藏輯要

道德真經
彭鶴林集註

三

心集七

煉陽陰極則陽生無爲之妙天地之要變化之機也故牝常以靜勝牡焉以靜而爲之下靜則羣動趨之下則眾高赴之天下常勝之道也

黃茂材曰夫道非徒下之而已雖曰下之其終也必有以勝之必有以取之牝柔也靜而處下然能勝牡此非下之而終有以勝之者歟大國以下小國則取小國湯事葛是也小國以下大國則取大國勾踐事吳是也此非下之而終有取之者歟故曰或下以取或下而取亦其自然之理本於無心大國不過欲兼畜人小國不過欲入事人兩者各得其所欲故大者宜爲下

御註曰天道下濟而光明故無不覆地道卑而上行故能承
天人法地地法天故大者宜爲下

道真仁靜先生曹道沖曰大國得小國則益盛小國得大國
則遂安各遂所欲大者能先下之則小者歸故宜下

陳象古曰大國恃強鮮能下下今獨言大者宜爲下明所難
也

黃茂材曰夫有所欲於人而不能下人則不得其所欲大國
欲兼畜人小國欲入事人能下則得不能下則不得至於道
固無欲然欲至於道是亦爲有欲也大者道也故宜爲下此
一篇全是借物明道

道藏輯要

道德真經
彭鶴林集註

真
心集七

太上道德真經集註